

四庫全書

集部

欽定四庫全書

集部
建康集卷二

詳校官庶吉士臣翁樹培

侍讀臣孫球覆勘

總校官進士臣朱鈐

校對官中書臣高 中

謄錄監生臣李傳燮

欽定四庫全書

集部四

建康集

別集類三家

提要

臣等謹案建康集八卷宋葉夢得撰夢得有春秋傳已著錄陳振孫書錄解題載夢得總集一百卷審是編八卷今俱不傳又載建康集十卷乃紹興八年再鎮建康時所著此本八卷與振孫所記不合書末有其孫輅題跋

亦云八卷其為書錄解題屢經傳寫誤以八卷為十卷抑或舊本殘缺亡其二卷後人追改輟跋以偽稱完帙則均不可考矣夢得為蔡京門客章惇姻家當過江以後公論大明不敢復噓紹述之焰而所著詩話尚尊熙寧而抑元祐往往於言外見之方回瀛奎律髓於其送嚴峇北使一詩論之頗詳然夢得本晁氏之甥猶及見張耒諸人耳濡目染終有

典型故文章高雅猶存北宋之遺風南渡以後與陳與義可以肩隨尤揚范陸諸人皆莫能及固未可以其紹聖餘黨遂掩其詞藻也
乾隆四十六年二月恭校上

總纂官

臣紀昀

陸錫熊

孫士毅

費墀

總

校官

臣

陸

費

墀

金定四庫全書

提要

欽定四庫全書

建康集卷一

宋 葉夢得 撰

詩一

赴鎮建康過京口呈劉季高

客路重經黃鵠前故人仍得暫留連
長槍大劒笑安用白髮蒼顏空自憐
照野已驚橫雉堞蔽江行見下樓船
灞陵醉尉無人識漫對雲峯說舊年

時季高在新
城上月觀

將至建康將佐出迓

遙憐部曲遠相迎
猶記當年驃騎營
莫作揚州貴人看
箭聲聊聽餓鷓鴣鳴

再至建康

老罷那知力已疲
君恩誤遣出車詩
金湯自鞏中原地
熊虎空高大將旗
江海百神朝魏闕
風雲千里護彤墀
白頭再啟征西將
深媿甘棠咏去思

推轂何堪付老儒
腰間仍佩玉麟符
千門萬戶朝天闕
二水三山非故廬
談笑定誰能却敵
衰慵真自笑非夫

淮南金鼓連滄海為趣嫖姚速獻俘

府中即事

稍喜攬槍欲漸清離宮雙闕照層城不驚巷陌銅駝沒
自愧兒童竹馬迎衰謝豈堪仍簿領病慵久已廢杯行
三山不動潮頭過洶洶江流自不平

行吟坐笑往來頻俯仰之間迹已陳可是猶思建鄴水
却應喜近洛陽塵十年徧閱三行闕

余自維揚臨安及
今凡三至駐蹕之

地四海奔馳一老臣未有夷吾在江左載車空換兩朱

輪

送模歸卞山并示僧宗義為余守西巖者三首

自我離山間忽已兩改月饑人不忘食未坐先已說家
僮挾書至驚起慰愁絕推尋到難犬問訊窮曲折此生
豈多為一壑萬慮滅可能復大錯更鑄八州鐵

江東領
八州

汝歸馬蹄輕初不恨觸熱殷勤報松竹吾豈成久別

端居探幽竒自謂略已徧昨登西山巔雄絕昔未見溪
湖莽吞吐雲物紛百變乃知十年間尚或遺勝踐巢成

輒棄去我豈秋社燕

築南山絕頂亭
亭基垂成而來

為吾課童僕開闢

盡二面莫言羊腸險徑小煩屢轉杖藜不用扶吾脚猶

爾健

生長在山間從翁守蓬戶人言膏粱子粗免汚紈袴官
居無多戀暫止復遽去家法恐未傳此心良已素義禪
晚從我似識此間趣西巖鬱嶽岑久斷俗子路聊持山
中節為我主留務封陞際湖海雲月皆所部

建康舊俗貴重九上已諸曹皆休務祀神登北

山叅議馬君獨不出攜詩相過因言石林之
勝次其韻

倦飛歸鳥正思還叩戶聊分半日閒勝事漫同談栗里
佳時休笑負龍山簿書已老無餘力香火朝真有舊班
他日尚期能過我試窮千嶂共追攀

去歲以九日期賀子忱徐惇濟祝子權為松竹
臺之會作寒字韻詩唱酬數次今歲郡齋獨
坐慨然有懷復用前韻寄惇濟子權時皆在

湖州

地近中原怯早寒一杯何處復追歡同尋澗壑閒誰共
強逐風塵老自難歸夢孰知元有約故情應得舊相看

閉關且示維摩病圖畫他年付瓦官

世傳顧凱之畫維摩像皆此間瓦官寺

本也

郡齋望蔣山

十年在空山未覺與世殊再來撫城郭始悟非吾廬豈
不有華屋旌旗拱上都我冠坐清旦百里前走趨而我

麋鹿姿悵然若囚拘忽看北山岑窅兀當坐隅歡言顧
之笑便欲凌崎嶇似我槿籬間層巒儼相扶遙瞻不得
往起步空長吁少年四方志顧眄略九區哀慵一如此
畢願終田間拙艱固應爾豈但悲老夫

自和

生涯一茅屋物役忘萬殊再為東諸侯作軍蒐被廬追
尋念往迹六鷁慙宋都

余以請官
祠去官

浩歌記土風誰能和

且趨自笑良已隘真成振株拘聊云效知止未敢傷庶

隅茲山閱人多龍蟠委崎嶇寄我千里目筇枝尚堪扶
但愁見中原驚心愴嗟吁何由返我室小徑遵茅區未
用懷遠遊蒼茫賦三閭明當秣我馬解組戒僕夫

西齋初成解中舊有太湖石數十枚因壘之庭

下

萬壑千巖不易求壺中聊寄小瀛洲稍看碑兀雲峯出
便有檀欒桂樹幽絕境自知難遽忘竒蹤爭怪獨能留
山翁已老猶兒戲漫擬伸眉一散愁

與晁激仲夜話

外家文采到諸郎廩廩詞鋒未可當伴我何辭共戎馬

憐君聊欲濯糟漿

激仲以池州酒正從余辟

殘年落寞風塵際永夜

從容銀燭光祇恐扁舟吾欲去病慵無意薄淮陽

次韻答激仲

牛渚誰逢臨汝郎參軍暫肯佐戎行世緣不擬營三窟
人事那求饋五漿春近嶺梅橫素蕊夜寒霜月落飛光
十年情話何由盡邑邑傷心嘆渭陽

再答

生涯久許捕魚郎
鳬鴈相追不亂行
但遣陶廬有松徑
不辭楚酒醉椒漿
交情老柏寒方見
妙語靈珠夜有光
回首漸知歸路好
已看梅柳動初陽

又答

家聲合繼紫微郎

晁氏自文元文莊皆常歷知制誥至以道復為中書舍人

不獨詩

同沈鮑行晚歲清談淹幕府
中原喜氣望壺漿
頗聞時論憐衰朽
空愧君恩負寵光
肯許輞川期後約
彈冠知

不借王陽

閱武士回邊報與山中信併至

椎牛饗士隘棘門投老兵間強自論稍喜並邊無牧馬
却慙空帳有驚猿乞盟似欲回天意排難誰能報主恩
壯志蹉跎真便爾獨懷搔首望丘園

雨夜西堂獨宿

華屋非所安憶我三間茅閉關傲初寒坐聽風雨交燈
火微黯淡松篁雜蕭騷一枝寄宿鳥自許無傾巢我非

乘桴翁詎敢辭繁匏竭來亦何事
大士從僧包忽聞報
嚴更鼓鐘亂鉦鐃慨然念故棲
此地寧久拋君知芥舟
微但可浮杯坳去矣無更疑作
詩聊自嘲

雨夜與模論中原旦起模與徐惇
濟游清涼觀
形勢嘉其有志因以勉之

千年石頭城突兀真虎踞蒼茫劫
火餘尚復留故處大
江轉洪濤騰踏不可御空城寂寞
潮日暮獨東去登臨
欲弔古俯視極千慮吾兒勇過我
蓐食穿沮洳謂言撫

中原未暇論割據功名亦何人我老聊自恕他年報國
心或可借前箸無為笑頽然已飽安用飫

連日邊報稍稀西齋默坐至夜分

鼓角遙聞出塞聲邊風吹鴈過高城疆陲無復戍已尉
盜賊猶憐壬午兵歲晚胡牀閉深閣夜長刁斗聽連營
便須從此傳烽息要及春農論勸耕

獨坐不得眠讀舊書

青燈相對久無眠擁毳無人伴夜閒閉戶便能忘屢迹

炷香時自續爐煙辭家屈指驚三月撫事關心愴十年
漫展殘書亦安用可能猶欲絕韋編

懷西山

西山十畝強高下略不齊嵌空抱奇秀上有凌雲梯小
屋八九間茅簷敢辭低所欣面勢好老稚通扶攜密竹
轉脩徑老松故成蹊仲冬景氣肅碧草猶萋萋仰視天
宇大四觀渺回溪徐行信足力未畏成顛躋用意各有
適孰云無町畦平生幾濡首末路多噬臍不作巢幕燕

肯從觸藩羝胡為濫麾鉞坐聽鳴鼓輦外物委蟲臂全
生思馬蹄可能三徑草歸路老更迷

杜堅大夫作南窓求詩為賦

意得不顧多心閒本長虛超然適有契天地良有餘頗
念彭澤老所懷常晏如南窗僅幾何盤薄萬古初束帶
悟已往世紛便能踈懸知千載情共有三間廬杜子老
不遇買田賦歸歟西山鬱攢空江水繞故壩衡門閉松
菊亦有琴與書邂逅一杯酒安知我非渠

送光上人還湖南光丞相吳元忠之母弟舊名
惇字元常以進士入官已而棄家祝髮云

棄家忽若遺四海吳元常軒冕安足輕妻孥等毫芒古
來惟仁者有勇故莫當根也自多愆此心焉得剛相君
抱壯烈慷慨志亦償徒悲蕭長倩屢折終堂堂子居真
俗間袖手每在傍十載復相見掛帆上瀟湘

山間每歲正月望後梅花盛開多與客飲花下
今年郡廨獨坐十四夜張暘叔晁激仲相過

共話宣和間事慨然歸不能寐因以寫懷

山頭野梅白玉花月明弄影紛橫斜青天無雲萬峯立
下有十畝幽人家年年春歸不暇省但掃雪徑尋寒葩
老夫已忘少年事燈火豈念更繁華一杯起步徧空谷
破屋歸卧瞰朝霞陪都復來亦何有凜凜殺氣浮高牙
重關深鎖夜漏永忽記昨夢翻長嗟景龍門前一月會
金盃賜酒餘雄誇神州陸沉近歸我漢節方議通胡沙
天翻地覆那得料忍復更聽漁陽撾

次韻馬參議同游蔣山

華屋驚隨劫火飛江山空自繞邦圻靈蹤可使超千載
妙解誰從寄一微著屐尚堪窮碧落據牀聊伴俯清輝
追尋會識關心處未怪衰翁苦憶歸

再次韻

頽垣敗屋落花飛草草春光亦故圻但愛野塘輸淥淨
不知風景轉清微帳空尚憶猿驚曉基廢猶傳鳳覽輝
女几自無平賊意坐來休笑久忘歸

三次韻

荒林寂寂鳥飛飛
舊事那容數一圻
山色自憐雲泱莽
暮寒猶作雨霏微
談餘故喜舌仍在
境勝端知玉有輝
問取塔中黃面老
此身何處是真歸

四次韻

雨厭殘雲暝不飛
亂紅猶欲點春圻
蔣陵路絕人誰到
蕭寺庭荒迹已微
偃蹇松篁空自老
參差觀閣舊相輝
令威等是千年客
想有遼東獨鶴歸

偶至劉少師園二首

葉底黃鸝一再鳴，故知久住識人情。
習家池館元無禁，應笑山公自懶行。

老木參天拱十圍，何妨桃李間相依。
却憐韓令功如許，不為山丹少霽威。

蔡子因相過留踰月

解作江山一月留，仲文儒雅更風流。
欲知爵躍心能喜，正愛蟬連語不休。
築室君方論並舍，

子因約同居霽上

歸山我

已辦扁舟交親四海今餘幾萬事傷心付白頭

次韻再答子因

人事紛紛去不留客心空感大江流已拚瓠落真何用
那得鐘鳴尚不休鄰里朱陳無別社江山李郭有同舟
若為便覓苔溪路六月明珠剥芡頭

蔡子因前韻留別再答二首

早時物望冠陳留

蔡氏自言出陳留蔡謨後

晚悟禪心更不流安用

前身真阮籍

項有方士言子因為阮籍後身

久知此道得孫休千年會

有歸來鶴萬事元同不繫舟邂逅一菴隨地有不妨衲
被對蒙頭

已議營屯列上留稍欣羣盜障橫流三時舊業終應在
萬里長征亦少休和策但令均挾纊壯圖何用輒焚舟
東都自是興王地虎踞寧須問石頭

劉太保招撫淮北劉馬軍屢奏捷

先聲已起故將軍卧治何勞病使君冠帶豈能忘舊俗
山河亦自惡妖氛羽書奏捷無留敵輿地論封有策勲

橫梁賦詩非我事
車書會復見斯文

題子因雙鳩百葉桃畫

百葉緗桃照眼明
繁枝似見雨新晴
故知睡足聊相並
不作林間逐婦聲

徐惇立罷吏部郎官出守天台待次卞山舊居
因寄

嵇康不作絕交書
出處蕭然兩裕如
錦帳不妨游省戶
草堂還得賦郊居
傾崖濺水青雲上
夾道輕陰落絮餘

肯記舊游聊待我未須催駕赤城車

陳子高移官浙東戲寄

幕府陳琳老官身戀故溪解談孫破虜那厭庾征西未
擬煩刀筆聊應謝鼓鼙登臨如得句小字與親題

戲示幕客

不用黃金更築臺一時傾蓋盡奇材關中豈是穰侯物
須怕諸侯客子來

章幾道將歸小飲懷謝城父

中年甚畏別交親
況復雲山舊結鄰
澗谷何時同笑語
干戈已老更風塵
少留對榻聊分坐
多病持杯漫幾巡
賈傅長沙知健否
洞庭波浪渺無津

聞邊報示諸將

挿羽驚傳赤白囊
邊塵動地尚跳梁
頗聞廟算無遺策
但遣封人謹豫防
送死定知天悔禍
追奔寧使汝爭彊
將軍剝有封侯印
盡掃無令一鏃亡

敵兵復過河王師出討

羽檄初徵天下兵，誤慙一陣守王城。
秦兵出嶺終何得？漢將征遼會掃平。
便遣幽燕驅號令，久憐河洛起攬槍。
書生豈解論幾事，不信平涼有劫盟。

始議講和，余數言其不然。

遣晁公昂按行瀕江營壘

他日傳烽望夕煙，重來老更負戎旃。
我言固自平平耳，王事那辭數數然。
轉餉未應勞木馬，摧鋒猶或要戈船。
天威本自無多殺，萬一征和屬此年。

聞敵兵將過淮，再遣晁公昂覘師

單于屢慣騁長驅未省新軍有被廬

時張韓兩軍治師甚肅士極賈勇

快飲勿辭金鑿落先聲須破鐵浮圖

敵將下親兵皆精練號鐵浮圖

官爾自疲千里

敵遣師往來國中號趨官日行數百里

飛將吾寧較一夫

試向八公山上望當關何用守濡須

壽陽為江淮襟喉曹操先得之故軍

每至濡須東晉能保有故謝玄有淝水之捷云

登南城

大江南渡是長干北望清淮歲已寒廢壘至今聞鶴唳

蒼山從古自龍蟠髣髴毛白盡空看鏡髀肉銷來尚據鞍

折筭不能答勅敵遺規猶有漢衣冠

與陳子高夜話

鼓角開東道山川壯別京
病慵憐竊食幽憤敢論兵
廢簡鈇黃暗馳囊赤白驚
蓑衣聊自喜時見魯諸生

送馬參議觀國從辟劉太保

伏波老自厭壺頭壯志諸孫凜
未休稍喜烽烟從絕塞
即聞貔虎靜中州先聲早已傳
推轂碩畫聊煩佐運籌
好去劉公書一紙無忘老子
上南樓

次韻馬參議留別

戎車百輛去難攀，秣馬前驅矢石間。
折木舊津吞朔易，神都新令懣完顏。
傳聲已報連三捷，觸熱那辭冒百艱。
束縛會看擒頡利，灰釘何待執戎蠻。
清談一笑時能共，妙語千篇未可刪。
緩帶且從黃閣卷，戎冠行奉紫宸班。
分攜生歎虛懸榻，老病懷歸祇故山。
他日小舟能過我，萬峯深處有柴關。

寄潭州謝城父

南國波濤已過春稍清羣盜剪荆榛孰知賈傅傾多士
但說番君得遠民痛飲千鐘應可強傳書一紙未能頻
臺評袖裏猶多在莫枉汀洲詠白蘋

久不飲酒厨人獻白醪却之

老大無堪百不能年來但可飲三升齋厨何用須佳釀
莫遣征南誤見稱

立秋二首

江上西風萬里秋際空高浪洶回流他時譽賊真非策

此日摧鋒盡有謀
天險漫能憑故國
陸沉端復恨神州
將軍競綰封侯印
誰為吾君更解憂

蕭關隴水隔天區
壯士何人肯執殳
一日頓傳三節度

是日聞陝西
三帥並建節

十年空闕五單于
坐談激烈心猶在
疲俗彫殘喘未蘇
安得倉箱盈百萬
少令天下足軍儲

秋高申戒諸屯示幕府

草枯馬健已高秋
堂上應須早伐謀
傳箭猶聞聚蜂蟻
控弦那得犯貔貅
書生自昔工磨盾
壯士于今勇挾輈

快使營平歸印綬貂蟬敢望出兜鍪

寄順昌劉節使

四海烽烟久未平遙聞苦戰有奇兵妖氛盡掃人誰敵
捷奏初傳我亦驚授鉞已欣傳帝澤揮戈終見靜王城
軒臺固有英靈在更遣將軍得令名

二月六日敵兵犯歷陽方出師客自吳江來有
寄聲道湖山之適趣其歸者慨然寫懷

松江浪靜如鏡平菰蒲長春秋水生晴沙回鴈久未到

坐想白鷗憎眼明五年辜負釣船約故人疑我真逃盟
豈知塵纓不易濯正想滄浪之水清朝來鐵馬暗江北
中流疊鼓雲濤傾樓船十萬下采石旗纛滅沒天戈橫
書生事業今乃爾授鉞孰敢辭專征豈無傳檄走飛騎
漫復長嘯登高城文思天子民父母大度未忍鑒奇兵
澶淵一矢安五世明日儻或傳諸營

淮西軍連日告捷喜成口號二首

一戰聊麾十萬師西來捷報走黃旗六羸壯騎終須去

九虎將軍亦謾為

敵將龍虎輔國等將軍皆其用事尊官

面內疲民元不

改

拓準之捷驅虜吾民盡復得之

從中勝算自無遺

自敵兵過淮凡指授諸將盡從中出

臨軒想見天顏喜百辟歡聲動玉墀

蛇豕何知闕近垆且欣鏖戰掃欃槍寄聲急走破羌帖

歸路還經送客亭多難兵間頭更白

事見光武

放懷物外眼

終青花殘不負巖邊約更看前楚老上庭

老上龍庭匈奴地名

為山亭後有小池叢石間得石螭因以斛汲水

導注之

微流自作小潺湲底處奔崖落迸泉驟喜忽聞飛雨過
却疑驚起老龍眠憑軒但遣時醒耳裂岸何須去拍天
索寞歸心誰與寄家山不到已三年

為山亭移植冬青等近遂成陰

一寸蒼根手自鉏年來繞屋亦扶疎客來但愛清陰好
不見幽人澗下居

小飲示幕府

邊書日夜急王旅方徂征我非劉越石長嘯徒登城緬

想豺與虎行當築鯢鯨傳車日邇來風雷走天聲

連日中遣

庵人齋金帛
搗師者經過

黃旗三面至捷奏紛紛橫天塹限南北長

江正東傾諸君亦良苦唾口爭請纓誰云凌煙閣自昔

無書生卮酒安足辭勉當建雄名

李賀詩請君試上凌煙閣若箇書生萬戶

侯

建康集卷一

欽定四庫全書

建康集卷二

宋 葉夢得 撰

詩二

徐惇濟書報嘗過余石林

繞澗新添數百竿故人書為報平安似聞謾謾山風響
正想陰陰夏簟寒老大不能窮蠹簡歸來便擬掛塵冠
一杯且覓林間約莫枉山王廢舊歡

夜聽莫撫幹彈琴流水操

故山不在眼，遠想流水聲。佳人南風手，起我澗谷情。十載厭聲鼓，囂塵亂鳴鉦。蕭然洗病耳，為鼓一再行。度險微斷續，奔前忽琮琤。淒風拉遠響，薄月當微明。亂石拱高下，回環亦崢嶸。吾歸正自爾，猛士方西征。年少勇過我，敵愾衛王城。請更落雁操，山水音正清。

送沈傳曜

卞峯摩青空，東望烏氏墩。豈忘宿春糧，終媿一款門。邂逅此相過，傾懷得徐論。人言解牛刀，要使治劇煩。未悟

清廟器朱絃列罍尊我衰百慮息但念三畝園王師肅
西征萬馬先雲屯何力償賜履緬慙羨歸軒寄聲舴艋
舟想見浮鴈村清冷尚可釣無使雪水渾

八月二十日

漸覺涼風入軒窓亦自幽漫能持麈尾終憶釣槎頭故
我從添老愁予不為秋新醅知熟未衰謝茗為酬

偶書為山亭五首

為山亭下小巔岼只欠蕭蕭竹數竿但遣飛流時漱玉

且將歸思為翁寬

微風似與洗庭除
石枕蠻藤不負余
八尺方牀聊已足
可須仍要讀殘書

僚吏相哀白事稀
抱琴時自弄清徽
何妨共倒樽中渌
不怕鳴騶問道歸

消息初聞潁水清
東君更復過蒙城
應須鄂渚兵同入
敵壘聊煩盡剋平

使節交馳數路分
頗知旰食念前軍
疾須圖上金城策

一見真堪勝百聞

次韻程伯禹贈宗室趙朝請

人物相望不並時使君冰鑑有真知
未論理窟傾三語只鬪詩壇自一奇
擾擾干戈猶戰伐紛紛簿領更喧卑
應須便作高軒過好德何人佐我儀

次韻程伯禹用時字韻見寄二首

衰病侵尋豈故時暮年懷抱祇公知
彊論出處初無意底有文章更好奇
王氣山川元自壯歸心茅竹敢嫌卑

中原趣下王正歷盡使遺民復漢儀

漢道中興此一時虞亡不臘爾何知地中鳴角無多怪
堂上論兵固有奇夢櫟那求梁棟遠搶榆正羨羽翰卑
淮陽汲直猶高卧願看簫韶集鳳儀

送表弟晁公耄泐海師幕

巖邑相望數寄聲十年湖海最關情談鋒尚憶傾甥舅
鬢雪何堪數弟兄飽讀父書聊自足深知民事却須評
揚旗且逐樓船下萬里波濤本不驚

公耄說之子罷遂
昌令頗能言浙東

民
事

題晁公耄惠崇溪山

荒林翳宿莽脫木寒無煙不知三間茅中有幾醉眠山
遠尚見雪江空欲吞天歸舟定何許滄波方渺然

再賦

惠崇殘筆老尤奇袖裏溪山每自隨欲識滄波無限意
此間惟許當家知

觀化堂編校舊書

赫日真能永微風亦自涼故應便北戶何敢厭東牆汲
水聊為戲繙書却未忙平生閒與懶併覺味魚長
翰墨他生業山林晚歲心那知身已老但覺意增深捉
麈誰能話扶筇可細尋晚來庭鵲喜似恐有歸音

憶朱氏西澗

澗下流泉澗上松清陰盡處有層峯應知六月冰壺外
未許人間得暫逢

憶向中流置竹牀萬錢無處買清涼只今路斷無來客

自撥新筭醉幾場

雨後為山亭獨卧

過雨虛簷氣稍清卧聞刁斗起連營幾看薄月當軒過
驚見陰蟲繞砌鳴洶洶南江浮靜夜寥寥北斗掛高城
白頭心事今如許慙愧兒童話請纓

七夕

七夕仍殘暑三年記此宵傍簷依嶺月欹枕聽江潮
大何妨拙槎迴未覺遙何須論乞巧河漢望星橋

送王陞歸知果州

何處西南是果州黃柑殊勝木奴洲使君自喜鄉閭近
騷客仍憐井邑幽盜賊燕秦猶未息山川楚越已先秋
原頭兵馬今多少更與將軍論木牛

祈雨

老農酣歌望捫腹旱魃何為敢予毒九淵再拜款神龍
仰望但見屯雲簇天公愛民亦自惜我愧無功神弗福
願看一洗注天瓢未須震暴如車軸

今年淮西感邊騎王師盡掃無餘類武王伐紂報豐年
今者驕陽豈天意東求三茅西采石塔中至人肯徒視
明朝掣電駭翻盆婦子猶能飽遺滯

再任後遣模歸按視石林四首

巖石三年別君恩未許歸從誰尋草徑為我款荆扉舊
繞山千疊新添竹一圍故人如見問端欲掛朝衣

白髮萱堂上孩兒更共懷弄孫那得見將母竟難諧已
絕功名望猶疑出處乖此心終未穩何處復安排

插架環千軸傳家有舊書展舒慙几案涼曝闕庭除破
屋防懸溜殘編足蠹魚好須重檢校局鎖莫令踈

細路穿南嶺新松幾許長毋庸馳馬足祗擬轉羊腸便
作高亭好初非亂石妨兩溪渾在眼似欲見帆檣

祈雨未應復請於茅山采石庶幾得遂之

苗當七八月之間甘膏不濡何太慳飛塵蓬勃晝欲暝
坐視雲物占羣山五日一風十日雨天方勤民輔明主
作書未敢訟風伯寄謝羣龍少勞苦

羣龍分馳不難興

俗謂五月二十日以後為分龍日

噴薄雲霧隨飛騰

中田勿憂龜兆坼倏忽便看溝塍盈老農何功報神力

但趣官租飽軍食中原軍儲自足供爾土明年更開闢

余每歲病肺往往坐達旦去冬以來偶不作遂

得安眠

衰殘每苦病相纏粗喜今年勝去年未說清樽酬爛醉

且欣高枕得安眠風塵不報邊烽入聖澤頻聞好語傳

時詔書屢下存撫江北流人

可是淮陽真卧治滿囊空費大農錢

聞莫尚書周侍郎已自鄂州過江入漢上

再見邊書欲請平將軍無事罷屯營傳軍已割淮壩地
牙帳仍收鄂渚兵勝日身猶堪策杖衰年耳自厭鳴鉦
角巾初了東歸約安用區區覲首名

東園草堂新成二首

官舍如何有草堂野人熟處是難忘池開月映千山迥
檻靜風生六月涼幽徑也從穿別圃小舟還似過橫塘
深知幕府文書省盡付甘眠亦未妨

密覆荒茅已數重中開別戶更相容苦無公事妨人樂

多有清閒借客慵南浦潮平分賸水

堂前池與河水通

北山路

近得青松

近栽北山松百本

怪翁歸意何能緩新築高臺見臥

龍

園中舊不見山因積土作臺遂見蔣山

三月八日草堂獨坐

四年身不到吾廬底處仍堪話左符閉閣漫憐公事少
投簪敢說宦情無軍聲早已吞窮塞使節何時反舊都
故作茅堂開水檻要知心自在江湖

徐惇立相過

茅齋一曲傍寒灣邂逅終年伴我閒契濶易驚成歲月

追尋空復望江山暫留客枕聽疎雨

時久旱方得雨

遙想吾廬

掩舊關落寞歸心誰與話坐談聊為起衰顏

同惇立游蔣山謁寶公塔王荊公墓晚過草堂

寺周顒故宅也

我居在城府再至俄二年豈無山水心可奈簿領纏今

晨偶乘興適此賓從賢零雨洗驕陽谷中聽流泉憑高

快速覽正見江浮天至人本無心與我常周旋誰云喚

不謗汝意自不虔

余自到鎮每雨暘祈
實公塔未嘗不應

麥隴稍已滋橫

水漲微漣佳城倚華表拱木埋貂蟬暮過草堂寺借榻
聊暫眠不復聞怨鶴茅簷但連延歸路踐落日羣峯鬱
相先回風送遠響墟里生晚煙吾廬悵何許東望良慨
然

明日復游石頭城清涼寺再用前韻

大江洶西來故國今幾年我衰倦登臨坐愧雙行纏忽

驚山陰集邂逅來羣賢俛仰弔前古高談注淵泉千巖
過宿雨餘潤滋麥天顏顏翳崖壁過午不得旋佛像再
經始

時兵火後寺盡毀
郡人再興佛殿

此邦心亦虔稍欣臺殿新廢沼

依淪漣坐懷馬化龍僅作蜉蝣蟬相傾走掣電詎暇安
枕眠六飛暫東巡恨爾不少延單于久凋殘屈已今我
先衰憊乘一障無功記凌煙乞身自茲始此計君儻然
又明日復同惇立總領吳德素運使章思台過
天禧寺登雨花臺再用前韻

言經朱雀桁復度白雞年

去歲辛酉

謝公不可見廢壘蔓草

纏三日瞰垆牧所懷多昔賢陂陀北城墩

城北有謝公墩

誰可

作九泉石頭控崢嶸目盡西南天定都記孔明赤壁方

凱旋

孫權定都孔明初勸之

惟初鼎足計用意良已虔更作長干

行秦淮亂清漣殘春掃餘花密葉未有蟬高臺畧四遠

綠野浮芊眠午陰久未移幽景為我延使君固不凡況

有嘉客先老大百念息矍餘豈遺烟了知塵外心本自

無間然

與惇立夜話有懷石林復用前韻

有山不能歸坐愧三十年

余營石林今幾三十年矣

冠服豈不榮狙

猿強包纏惟餘緇衣心未敢忘賢賢他日得吾子匣藏
駭龍泉衰頹為興起此腸寧非天單于玩兵久亦悟終
好旋叩關復請吏企頸志頗虔休兵固有奇撫事猶涕
漣投懷幸傾瀉知子非寒蟬十日對榻語夜窻了無眠
賈生侍宣室趣席方招延願上治安策何者今當先我
行返故廬跌坐看爐烟功名會及時佇子論燕然

用前韻送惇立

畏作親友別况復非中年身如三眠蠶已老鬣自纏竭
來守江關從事寧獨賢經年兩大入燿火通甘泉石林
豈壺中亦自有一天采薇敢言勤誰與歌勞旋上書苦
哀祈傾寫志已虔坐懷北山巖未見西溪漣人言搏風
鵬不及翳葉蟬共挽攜手客可忘曲肱眠首鼠信禿翁
胡為尚遷延子來幸暖熱愧我一飯先清詩似鳴玉想
見藍田煙索去何乃遽臨分重依然

為山亭晚卧

瘦石聊我伴遙山更爾瞻
泉聲分寂歷草色借廉纖
玉粒時能飽霜毛日更添
平生踈懶意況與病同兼

次韻方仁聲惠文編

他年落筆坐生風下舍諸郎敢長雄
操縵不能陪衆手
斲輪終自付良工
鏡湖漫憶歸狂客
漢上誰從過德公
會向南溪尋舊約
別開小徑共相通

戲方仁聲四絕句

戲弄扁舟泊宅村却尋三徑築茅墩雲邊此意真誰解
賸作新詩與細論

水檻新開似浣花傍溪須更作浮槎祇應屢費王弘酒
時要清樽對落霞

不惜囊錢信手空荒田却擬望年豐天公可是憐風月
判遣詩人一例窮

盧橘楊梅已及時我歸先自在前期平生不作宣明面
浪愧將軍建鼓旗

仁聲舊居城東泊宅村張志和常所游也今
徙西溪作雲茅庵因東崗為小亭號茅墩欲
傍溪開水檻久無資會郡守有饋之酒五十
壺不敢飲亟易之乃克成有田數十畝常苦
下潦余居石林與雲茅南北正相望故四章
皆及之云

次韻馬參謀蔣山開堂飯素

邂逅聊憑法供真茲山誰謂我非隣相追更喜同枝策

得意遙知了斷輪幽事要須塵外侶好詩仍惜鏡中人
歸來袖裏傳新句驚放巖花作小春

諸幕府見和復答二首

一勺清甘寄悟真

八功德水在定林寺址宋舊名悟真寺

覺城東路更相

鄰臺傾劫火無遺燼

寺經兵火盡焚

地轉奔風有伏輪但遣籃

輿從太守深知幕府盡詩人登臨莫忘千秋意不必山

陰記暮春

欲眠遣客笑吾真愛酒空牀羨汝鄰歸計已甘從短帽

倦塗何止畏奔輪高車不用三千客淨社須期十八人

倘許一樽仍破戒黃柑催釀洞庭春

是日客會者二十餘人以齋集不置

酒

次韻馬參謀新作山亭

家山千仞聳亭亭夢繞苔溪十里青
苦厭簿書迷老景坐懷丘壑寄頽齡
稚川可復尋勾漏靈運能忘過始寧
疊石且從開小徑苦寒仍喜報餘馨
天工未擬藏遺巧物態何曾有遁形
散策便思穿窈窕沉鉤真欲釣清泠

已看袖裏攜東海端向籬中得畫屏半世生涯皆福地

不妨歸更侍祠庭

余前後領崇福明道洞霄官祠九任二十一年時方又上章乞歸

方參議用前韻記嘗過余石林次韻荅之

不復襄陽寫孟亭草齋人道是丹青那知客自從文舉
但怪山能養伯齡世味無多真潦倒歸心欲寄每丁寧
遙聞徑竹添新影更想巖花作遠馨夜鶴未應真怨別
江鷗須信久忘形地偏故逐淵明遠風好常隨禦寇冷
癡坐正憐塵滿案醉眠終倚石為屏瀛洲學士煩追賦

尚記滄波接洞庭

卞山後即太湖正與
洞庭東西兩山相望

徽宗皇帝挽歌詞五首

制作三王舊憂勤一紀餘豈惟成禮樂真欲混車書
黼宸猶丹陛颺輪忽紫虛帝鄉歸路穩無復顧樓居

帝業承瓜瓞天倫映棣華千年垂接統四海自為家
畢郢終何恨蒼梧陟已賒廟壩驚指顧行路泣悲笳

脫屣初無戀遺弓故不忘金盤徒自聳玉椀且深藏
付託歸真主經營有舊章栢城森渭水空愧寢中郎

卜宅軒臺近因山禹穴深綴衣驚在匣黃屋本無心海
濶青雲隔天高白日沉秋風無馬跡惆悵屬車音
浴殿陪書詔甘泉忝侍臣虛傳遊帝所不復從時巡効
死終何日餘生漫此身攀髯知己矣揮涕灑江濱

哭趙叔問

劉氏磐石宗略分天下半斯文獨更生落落分族冠探
書到千古極意在理亂故宜蕭長倩憂國共長算我懷
崇蘭君多學真一貫束髮踵癯儒長檠媚空案胸中行

秘書領略能默斷埋光久不暴玉石終自判中年立周
行杞梓見脩榦雍容視出處未可亟招喚坐令護都水
不特美先漢荷囊侍丹宸正訝歸稍緩何為棄天閑一
往謝羈絆黃壚閉白玉萬事風雨散計來為失聲涕落
傷老伴孰知錦囊心無復銀鈎腕柯山渺何許日月忽
已換平生渾金質反覆要熟看至寶琢寒泓誰能撫遺
玩尚有千字碑臨風寄長歎

叔問三衢新居號崇蘭館
字畫尤妙蓄硯甚富皆奇

程致道作銘
敘其事甚詳

銘

賜硯銘

紹興己未六月臣某待罪建康之明年皇帝
以所藏御硯賜臣某謹再拜稽首而為之銘

曰

咸池之淵奎鉤所直發為天章號令攸出惟泰山雲膚
寸萬方帝澤之儲而臣之藏

新坑端石硯銘

望之盎然不耀其光即之璀璨不暴其剛下巖之澤竭
取之其陽是為雲者初耶尤以見其祖之良

李師蘭硯銘

靡之勿利挹之勿槁毋慢其藏不貪之寶

晁激仲琴硯銘

鳴不為球拱不為璧有軫匪經寓此盈尺孰謂大者訖
藏無聲勉子筆端發其鏗轟

二井銘

紹興壬戌六月甲子建康府新作二井於州

治前銘曰

予者不窮取者不爭用惠我民以安其生毋瀆其煩毋厭其多我民資之視彼濤波

右左銘

吏之勤民如井日劬民之從吏如井日趨惟吏與民毋或自戾敬則甃之以閱百世

右右銘

似庵銘

草堂東北隅有地四丈結茅為小庵時方求
歸未遂或曰甚有似乎吾廬也乃名之似庵
而為之銘曰

惟大匪肖其似者誰曰似似之非我敢期穹然覆盂甚
狹而廣請視吾廬為一為兩

贊

東山圖贊

龍眠李伯時畫許玄度王逸少謝安石支道
林四人像作東山圖玄度超然萬物之表見
于眉睫逸少藏手袖間徐行若有所觀安石
膚腴秀澤著屐反首與道林語道林羸然出
其後引手如相酬酢皆得其意於俯仰走趨
之間筆墨簡遠妙絕一時無住道人少規模
伯時為余臨寫真屬殆不可辨更數十歲安
知天下不有兩伯時因各為之贊曰

揚眉軒然意軼萬里亦將焉往而竟斯止曰遠游者以是為游疾走息陰彼將安休

右許玄度

翰墨之娛以寫萬變不償一哂笑戴山扇袖手縱觀我行故遲豈以懷祖樂此逶迤

右王逸少

韞玉于山熒然不枯我觀此容非山澤儒却顧何為東山之陟如何淮淝乃折此屐

右謝安石

一世所傾顛倒軒裳是身何依獨委支郎從容三人亦躡其後人誰無言聊一舉手

右支道林

法眼禪師真贊

八萬四千大悲寶目問此多目孰為正觀惟阿那律無目而視問此真目畢竟安在是法眼者猶為金屑有法無眼有眼無法稽首道師五蘊皆寂悲觀慈觀等大圓

鏡頽然方牀如夢中事山河大地一切消隕



建康集卷二

欽定四庫全書

集部

建康集卷三

四

詳校官庶吉士臣翁樹培

侍讀臣孫球覆勘

總校官進士臣朱鈐

校對官中書臣高中

謄錄監生臣李傳燮

欽定四庫全書

建康集卷三

宋

葉夢得

撰

書後

書高居實集後

元祐末余與居實同舉進士試春官數往來舅氏晁無咎家時張文潛為右史二公一時後進所推尊每得居實文皆擊節稱賞不已居實試別頭文潛適主文居實果擢第一胡右丞完夫見其所賦主聖臣直聲言于衆

曰此豈賦耶殆有韻陸宣公奏議爾時國論頗厭文弊
初復唐宏辭科居實首中選復為第一於是名稱日聞
已而坐上書排黨論久不得調卒邑邑不得志以死余
後不復見居實然間有出其所為詩文者每見每竒始
天下名文章稱无咎文潛曰晁張無咎雄健峻拔筆力
欲挽千鈞文潛容衍靖深獨居實之文氣和而思遠言
約而理暢超然常出事物之外而觀者每有餘味故人
以為似文潛紹興己未余守建康居實之子紹持其遺

文一編相示兵火散亡之餘所存蓋十一覽之太息追數往游俯仰如前日事居實之志既不得伸於生以著後世者惟其文字又不幸不得盡傳于後為可哀已乃書其後歸之且以嘉紹之能不墜其業也

書明皇吹簫圖後

此周昉畫家舊有南唐摹本筆蹟如屈髮今亡之矣其傍有海棠一枝寧王坐其左執板者黃幡綽也此本出梁仲謨家僅存其五六爾明皇末年暇以自適但如畫

中亦安得有馬嵬事耶紹興庚申二月十二日久陰初晴為山亭與何彥發同觀

書鄒氏志完曾祖陰德詩後

某初任為丹徒尉獲拜忠公齒尚少辱引與論當世事及立朝行已大方諄諄累數百言如訓子弟至今不敢墜也今觀此詩知公之節有自來矣而復能推其所以與人不獨私其身君子之愛人有若是乎人惟不知陰德故以善為不足為而不為以不善為可為而無不

為是欺天也陳平自謂多陰謀後世即廢至曾孫何果
失國後力營之終不復得而于公以決獄之故責報于
定國如執左契取寓物天人之間此特其小者耳忠公
碩大光顯既已有驗於前而位不配德臧孫達方將有
後於魯此書不但鄒氏傳寶其家願與天下強為善者
共之也

書傷寒治要後

王仲弓人物高勝雖貴公子超然不犯世故居官數自

免博學多聞尤長於醫及與前世婁昌言常穎士來道
方諸人游嘗云疾之傷寒所在無歲不罹其患然治法
有證傳于經絡効于日數者不可差以毫釐張仲景書
在世如法家有刑統苟用之皆當可使天下無冤人而
庸醫多不解其見于形候者亦不盡審是既不能用法
又不能察情以故殺人不知其幾何因推仲景書作傷
寒證治發明隱奧雜載前數人議論相與折衷又恐流
俗不可徧曉復取其簡直明白人讀而可知者刊為治

要曰苟能原疾之所從來而驗之以候按我書而用之
雖不問醫士可得八九此仁人之用心也余嘗病東南
醫尤不通仲景術乃為鏤版與衆共之使家藏此書人
悟此術豈特無冤人而已調護之不失其宜服餌之不
失其節雖使至於無刑可也賢者尚無忽

書陸探微獅子畫贊後

陸生板畫天下惟此本初留建康境中唐太和間李文
饒鎮浙西徙至鎮江甘露寺余猶及見焉元符初甘露

火板亦隨燼常恨絕迹世不復見忽有得東坡所摹以獻會府治草堂成因傳寫為照壁屏之陰筆墨之妙雖不可追然尚可想其髣髴亦以存建康故事之一云

書方勺雲茅漫錄後

仁聲余少時識之場屋中博學多聞不專為舉子文詞尤刻意作詩客揚州師丞相蘇公子容厚禮之喜交當世名士遇其所合傾家資具饌歌呼飲酒窮日夜士亦以樂從之游家坐是貧仁聲不悔也既老結廬吳興西

溪之上因誦杜子美詩至何時一茅屋送老白雲邊欣然以為與其意會乃名其居曰雲茅庵平生詩文甚多皆隨手散去不復錄獨取近歲所存藁次為雲茅漫錄十卷余鎮建康仁聲年七十六矣間關自吳興特來見余意氣尚不衰曰吾亦安用此尚使後來居是溪者知有吾姓名爾兵興以來四方游舊零落殆盡存者不過三四人仁聲又居同郡時時數往來其可無一言然仁聲自言嘗從方士得服氣煉形法其貌瘠而不枯風月

勝時好事者能數載酒往其為雲茅之儲固未已也乃書其後歸之

書唐李弼告後

右晉州刺史李弼告紙書字細如蠅頭皆已漫滅其僅可辨者如此余見唐告多矣未有以紙書者

闕

序

程致道集序

余罷領宮祠居吳下致道亦以上書論政事與時異不得
調寓家于吳始相遇則其學問風節卓然有不獨見于
其文者即為移書當路論以言求士孰不幸因此自表
見其趣各不同若槩論其過一斥不復錄天下士幾何
可以盡棄之乎併上其文數十篇宰相見而嘆曰今之
韓退之也亟召見政事堂會有間之者復得聞秩然宰
相知之未已也宣和初復召入館稍遷為郎議者翕然
始恨得之晚自是二十年間卒登侍從為天子掌制命

文章擅一時蓋嘗論當孔子時固已患直道為難行而毀譽之不可信然人之有善君子未嘗不樂道其得譽常多至居下流天下之惡必歸焉其毀之者必衆則直道雖不可盡行于天下而天下終不能廢直道方致道齟齬於初一夫搖之不能自立及其久也雖非其素所厚善亦莫敢不謂然其善之效歟今觀其文精確深遠議論皆本仁義而經緯錯綜之際則左丘明班孟堅之用意也至于詩章兼得唐中葉以前名士衆體晚而在

朝雖不久遇所建明尤偉蓋其為人剛介自信擇於理者明所行寧失之隘不肯少貶以從物是以善類皆相與推先惟恐失雖有不樂之者亦不敢秋毫加病信乎直道之不可終屈也嘗哀次平生所為文欲屬余為序會兵興不果後遇火焚棄殆盡稍復訪集尚得十四五而益以近所著為四十卷夫天既以是假致道矣乃不使盡暴其所長病痺杜門里中且十年豈在人者猶可致力致而天反不能相之與不可知也紹興十年詔重

修哲宗史復起致道領其事力辭疾不拜而以其前欲屬余者請之堅甚致道之文固不待余言而後著也然先衆人而知之深者莫若余乃為論其本末歸之致道名俱今為左朝請大夫徽猷閣待制提舉亳州明道宮云

建康集卷三

欽定四庫全書

建康集卷四

宋 葉夢得 撰

記

紬書閣記

孔子曰仕而優則學學而優則仕古之君子未嘗一日不學也故傳記告高宗亦曰念終始典于學而譬學于殖不殖將落者原伯魯之所憂也建康承平時號文物都會紹興初為守官大兵之後屯戍連營城郭爵為榛

莽無復儒衣冠蓋嘗求周易無從得於是凜然懼俎豆
之將墜勉營理學校延集諸生得軍賦餘緡六百萬以
授學官使刊六經後七年余復領留鑰市廛五方雜居
生聚之盛雖非前日比然詢漢唐諸史尚未也顧余老
且荒廢亦安所事簡策念漢初去孔子時尚未遠一更
秦亂而書亡五十一篇詩亡六篇周禮冬官盡亡經且
如是而況其他屋壁之藏幸得保有餘其至于今尚存
者學士大夫相與扶持傳習之效也今四方取向所亡

散書稍稍鏤板漸多好事者宜當分廣其藏以備萬一
公厨適有羨錢二百萬不敢他費乃用徧售經史諸書
凡得若干卷廳事西北隅有隙地三丈有奇作別室上
為重屋以遠卑濕為之藏而著其籍於有司退食之暇
素習未忘或時以展誦因取太史公金匱石室之意名
之曰紬書閣而列其藏之目於左右後有同志日增月
益之愈久當愈多亦足風示吾僚使知仕不可不勉于
學干戈將息而文治興有民人社稷者亦皆思讀書無

重得罪於吾先君子之言云

府學記

先王以武定天下必以文終之江漢宣王南征之詩也
其言甲兵車馬之盛備矣至於末乃曰矢其文德洽此
四國治道豈不有本末乎衛靈公問陳孔子曰俎豆之
事則嘗聞之矣軍旅之事未之學也子豈以軍旅為不
足學哉以為知所以為俎豆則軍旅無不可為雖曰我
戰則克可也漢高帝悉定楚地獨魯不下引天下兵欲

屠之魯中諸儒尚講誦習禮絃歌之音不絕遂不敢加
而待其服大道之行固有不期然而然者孰謂魯諸儒
而能折高帝推而上之舜舞干羽而有苗格謂之誕敷
文德無足怪者蓋禮義之在人心莫不皆有苟未至于
絕滅不幸喪失雖至于犯上作亂徐返其本亦必悔而
知變善為治者可待之以變而得所向不可期之以絕
滅而終不返則文德其可一日廢于天下乎學校固禮
義之所從出而斯文之所先也建康領江左八州之地

于東南為大都會異時文獻甲于他方舊有學在州之
巽隅更罹兵火城郭鞠為丘墟獨學宮巋然僅存頽垣
敗壁毀壓相藉生徒奔散博士倚席不講紹興二年某
始以安撫大使分鎮方時自淮以北裂為盜區蜂屯豕
突輦鼓相聞蓋欲葺而未暇後七年大駕還錢塘詔以
建康為留都蒙恩復畀居守視事之明年輯寧荒殘流
亡稍復民益安業於是喟然曰可以有事於學矣乃命
其屬因舊址盡徹而新之起己未孟冬訖庚申仲春凡

五月為屋百二十有五間闢其南向以面秦淮增斥講肄列置齋廬高明爽塏固有加于前不侈不陋下及庖湑罔不畢具既又作小學于大門之東復命有司諏典禮簿正祭器作新冕黼皆中程式覈其田之在屬邑募民耕者千九百十五畝歲入其賦為米若苴與麥五百四十斛有奇坊之得自酤者三區歲入其課為錢百八十萬有奇地之占府城得佃而居者八十有五所歲入其租為錢六百七十五萬有奇各為圖籍以時輸之凡

廩給之費無有欺匿乃以上辛釋奠于先聖前期率郡
執事齋于兩序蓋諸生無不從視滌省牲惟謹昧旦夙
興籩豆在列肴酒靜嘉幣篚潔嚴史告時至以次就位
具笏垂紳珮玉鏗鏘降登伏興卒事無違禮成受釐齊
爵于阼觀者數百人皆駭其所未見無不太息感動退
而揖所與祭者而告曰嗚呼子衿之作鄭人之所恥也
是不知在鄭何公然傳載然明欲毀鄉校子產不可則
當子產時鄉校蓋復存是鄭之學未嘗終廢有子產則

能興之焉四方用兵踰十年學校之列于郡國者其亡
與存我不敢知惟天子以仁義勤儉治天下克復大業
願與中外休息還之承平者蓋終食不忘也上帝監觀
亦能歸我河南之地兵革漸息惟周宣王之德於茲將
興吾邦號陪都視定鼎郊鄘實為宗周是亦風化之首
其復有學自今始肉食者其可不推子產之為鄭以求
先聖眷眷俎豆之意相與先後輔成吾君之志布衣韋
帶亦必有宏達英偉之士拔于草萊接踵繼起由此而

出以共濟一世者子大夫尚勉之皆曰唯遂為記刻之石後來者其有攷焉

建康掩骼記

建康承平時民之籍于坊郭以口計者十七萬有奇流寓商販游手往來不絕建炎己酉冬敵既大入十一月壬戌南渡自溧水徑趣浙留其偽太師張真奴分兵五百薄建康宰相杜充率麾下北去知府事陳邦光以城降敵由是未盡肆其虐別築城于西南隅以居取城中

器械子女金帛儲之禁吾民毋得出州城明年夏回自浙東五月復至建康與所留兵合丙午入城始料其強壯與官吏以兵圍守於州之正覺寺散取老弱之遺者悉殺之縱火大掠越三日府署民廬皆盡乃擁衆去凡驅而與俱者十之五逃而免者十之一死于鋒鏑敲榜者蓋十之四城中頭顱手足相枕藉血流通道傷殘宛轉于煨燼之間猶有數日而後絕者官軍繼收復又一年烏鵲所殘風雨所蝕阡陌溝渠暴骨皆充斥行者更

踐處居者雜卧起與瓦礫荆莽相半也紹興辛亥天子
在會稽秋大饗明堂詔凡敵所破州縣暴骨之未殮者
官為募為僧若道者收瘞累數至二百則得度於是州
之寺五得其肄業精勤者二十人益以貧民之餓者食
而佐之度城四隅高原隙地各為穴以待藏出羨穀二
百斛錢三百萬以給費為籍日校其所獲以時檢察之
人欣然將樂效力閱十九日得全體四千六百八十有
七斷折殘毀不可計以全者又七八萬以次入于穴而

城中之骸畧盡十二月甲子遂瘞民之厄於兵革載籍
以來未之有也惟天子仁聖將為斯民請命于上帝而
不得則猶欲及其既腐之餘昔文王葬枯骨而天下歸
心其葬未必廣也推其所葬以及其所不葬而天下知
其可以王矣秦穆公越國而伐人及其敗也能封其尸
君子猶許以霸天生斯民必使之生養蕃息以厚其終
禍福與奪實將聽之其曰得乎丘民可以為天子殺一
不辜雖得天下不為者名之曰好生之德然則自敵薦

食中國奪天之所厚而殘之蓋不為量數而吾天子方
推其所以好生者一一而收之于後天固享之矣今此
億兆無辜之冤則亦必有聞者敵之亡其無日乎凡穴
深廣皆二丈以其四之三藏骨其一實以土其上封皆
高一丈在西門清涼寺之南茶山之下者二北門張王
廟之西北麟蛇山之下者二南門官道之西越臺之下
者二東門官道之北齊安寺之西者二合八塚督役者
兵馬鈐轄拱衛大夫寧州防禦使張禧都巡檢武翼郎

王利檢察者安撫大使司准備差遣奉議郎安自求迪
功郎沈正路工畢以狀上尚書明年二月禮部給牒而
度者華藏寺五人能仁寺五人保寧寺五人清涼寺三
人壽寧寺二人

建康府保寧寺輪藏記

維摩氏極天下之辨而反之于默其為法名之曰不二
夫不二即一矣不言其一而言不二豈以一猶為有在
者歟道未始有二也既以有物不得不裂為二彼自為

二而吾強欲一之必有廢其一以成其二者非道之全也要有非一而不二者存焉爾何特維摩氏為然孔子曰有鄙夫問于我空空如也我叩其兩端而竭焉空空云者豈有物實之者哉然有意其墮於一也則叩之以兩端蓋維摩氏所謂不二法叩之兩端而知其所解則以吾之所知證彼之所知可一舉而盡矣之人也謂之鄙夫則可謂之君子則不可佛以無所言而為一切衆生無所不言以為有言不言是顛倒見以為無言不言

是斷滅見孰能辨其非一而不二者乎自漢永平為佛
者始持其書入中國由晉宋歷唐至于今不絕梵語華
言更相發明傳其學者又從而申衍之其說遂充滿天
下輯而藏之皆設為峻宇高甍雕刻彩繪備衆寶以為
飾竭衆巧以為工苟可莊嚴者無不至梁普通復有異
人為之轉輪以運之其致意深矣吾少時見四方為轉
輪藏者無幾比年以來所至大都邑下至窮山深谷號
為蘭若十而六七吹蠡伐鼓音聲相聞襁負金帛踵躡

戶外可謂甚盛然未必皆達其言尊其教也施者假之以邀福造者因之以求利浸浸日遠其本建康府保寧寺當承平時于江左為名刹更兵火久廢今長老懷祖守其故址於煨燼之餘十有四年堂殿門廡追復其舊而一新之最後作轉輪藏余鎮建康時見其始經營後四年余歸石林祖以書來告曰藏成矣幸得記其本末祖蓋以正法眼傳其心其為人潔而通靖深而敏非徒以有為作佛事者也乃為推其師之言合諸儒之說正

佛之所以言以曉世俗之弊祖當益以是振之夫方無
所言則維摩氏之默如大阿難等得道受記諸大弟子
皆不任問病及其無所不言則雖觀世音亦從聞所聞
而入爾乃寺之興廢係其時人之施舍係其力有不必
記故不書

書為山亭石上

紹興辛酉正月金人以衆二十萬入寇壬戌渡淮據合
淝二月辛未淮西宣撫使軍出征癸酉渡江是夕敗敵

前鋒壁歷陽丙子又敗之于舍山戊寅又敗之於巢縣
己卯又敗之辛巳復寇和州又敗之壬午又敗之于全
椒癸未甲申又連敗之于關口丙戌又敗之于仙宗丁
亥又敗之于柘臯己丑遂敗敵人於店步復合淝庚寅
王師入廬州敵盡過淮奔乙未班師乙卯獻俘于王所
江南東路安撫制置大使葉某記

祝文

到任謁先聖文

某聞鄉飲之禮雖不足解平城之圍而魯人絃歌之聲
或可以却秦盜文德之修久矣某學無所成干戈之際
再臨舊治潔齋款謁有愧平生惟俎豆在列延見諸生
追求在泮獻馘之意使無子衿城闕之嘆猶不敢不勉
惟先聖尚鑒臨之

到任謁諸廟文

某頃者待罪此邦初無以事神而和其民今去之七年
上不以其不能詔俾復臨舊治而益之留鑰之重其有

愧于神多矣強敵未殄民之彫瘵尚多往者不及追來者未知免蓋惕然未敢安惟陰隲一方用佑相其封守則神固有常德而某實預受其賜此猶竊恃以安朝夕者神尚顧之勿忘

祈雨寶公塔文

某入境問民疾苦皆曰自春雨澤僅足播種而未洽乃五月不雨至于今禾之將秀者蓋病矣比連日雖霑油雲之潤而境內猶不徧及閔閔之憂在于旦暮歷旬不

繼則民必有受其害者用是惕然不敢安惟至人無心
與法皆一遠邇何擇孰非慈哀願矜憫迫之情特施廣
大之惠使民得益蘇于彫殘安輯之餘則某亦庶幾免
咎于勉強蒞事之始誠意殫盡此言必聞

祈晴寶公塔文

惟我邦人仰依法蔭迫窮赴愬凡有急而必歸艱厄更
嘗蓋無求而不應今茲淫潦殆已彌旬苟朝暮之未回
必高卑之皆病願宏普濟俯鑒羣情萬億有藏亟被秋

陽之暴十千並耦終觀歲事之成庶俾豐穰益蘇彫瘵
祈晴諸廟文

去歲夏旱民力未蘇今春牛疫繼之南畝之艱亦已至
矣而連月陰霖不已復將害於秋成方中原有釁王師
在途調發屯戍無非出于民者歲或不稔公私皆病神
豈重困之乎靈鑒不遠有禱必聞懇迫之言不待再三
尚祈昭荅在此朝暮願同彫瘵均受神禧

謝晴寶公塔文

經春多雨懼有害于穰盛歸命控祈竊仰干於慈蔭亟
蒙昭格盡掃陰霾歲有麥禾稍愈疲民之望官藏困廩
更寬慢吏之憂大施無邊頌言莫罄

謝晴諸廟文

某待罪此邦歲月將再凜然念民事之艱未嘗終日敢
忘比以陰沴失常預申虔請不踰旬浹卒荷鑒臨寒氣
既藏陽光訖見農夫之慶已若有秋敢祇薦于菲誠尚
有祈於終惠

祈雨諸廟文

眷茲江壖例若愆亢適惟敝邑雨澤以時布種既周秋
成可望尚須霑霈以訖有收願推濟物之慈更廣油雲
之施仍均遠邇咸獲豐穰豈徒一邦獨受大賜尚祈孚
鑒克諒菲誠

再祈雨諸廟文

古者謂吁嗟求雨為雩皆請于山川百源而春秋得雨
書大雩皆在建午建未建申之月是知水旱豐凶雖天

有數苟精意以禱山川之靈亦必應之某待罪此邦無
政及民干神之誅則已多矣重惟一方兵火之餘春夏
以來雖幸穡事偶周而亢陽為災時澤不繼苟復困之
盖有不勝憂者用是惕然卧不安席詢諸耆舊徧縈于
境內神祇昔魯僖公有憂民之心春秋歷月不雨則書
而文公之急歷時纔一書豈惟不容于王法亦以見神
厭其德而弗之福某之譴尤固無所逃若其區區未忘
于民則尚惟聰明俯鑒朝暮之間賜以霑渥無俾重為

民病乃罪罰當降于身則不敢辭

謝雨送洞府龍神文

早嘆之憂慄慄危懼徧崇百神曾莫肯顧粵惟神龍呼
吸雲霧是惟其職奔走往訴敢勤于行救此朝暮風馬
在途若聞指呼一雨三日澗壑流注焦槁盡興如手親
拊敢曰時澤實惟膏乳愧我不德孰逃神怒仰懷威靈
自以民故奠筭拜賜尚弗我吐功成不言載肅徒御躬
率邦人言錢于路鼓鐘喧轟旂纛翩舞神德在人既飽

既哺我獨何為永鏤肺腑

謝雨諸廟文

秋穀將登時雨不繼念驕陽之方亢恐失時和仰神聽
之不遥輒傾誠請潔躬以俟決日于茲凜然朝夕之憂
彌切雲霓之望訖蒙霈澤惠以有年惟神念民固重矜
其久困顧我不德亦仰被于深仁卮酒告誠廟貌如在
永言思報不解愈恭

祈晴諸廟文

去歲夏旱害于秋成民窘艱食日延頸而望幸免溝壑者惟此一麥而已入春以來淫雨不止歲且三月懼不克濟則乏絕之憂僅在旦暮敢以肴酒請千百神冀憫彫殘稍回陰沴豈惟寬吏之責得以苟安亦以戴神之休其將無已

祈雨請寶公入城文

兵戈之後十室九空公私所須惟在南畝苟或罹于一歉即坐致于百艱幸茲春夏之交適獲雨暘之節疲氓

盡力布種稍周懼迫驕陽尚資時澤敢祈覺力重憫凋
殘特紓愆亢之憂賜以霑濡之惠遺秉滯穧豈惟足一
時婦子之求積廩高困庶以償十年溝壑之患精誠所
叩妙應無方

謝雨送寶公還山文

歷月不雨徧禱百神卒歲之憂僅在十日輒以吁嗟之
請仰干慈濟之仁爰舉舊章載迎遺像翕然雲霧即見
于崇朝霈以甘膏不踰于旬浹神龍效職帝命不違救

焦槁于垂成整彫殘于既弊敢以往來之相竊窺妙智之功惟我邦人夙依慧蔭疾痛而呼父母有感必聞沉溺而援舟航無求不獲自今以始不敢懈怠尚念鄰邦猶多懇請法慈無礙豈此疆爾界之殊民意所須皆東作西成之望願均此施普及蒼生

祈晴寶公塔文

江干下濕水潦所鍾春雨過期麥苗將病重軫勤民之意敢忘先事之憂法施無方雖微不間民情所向有請

必聞願除陰沴之災亟正時暘之氣庶安疲俗復享豐年

祈雪諸廟文

日已至矣二麥在田嗣歲之須時雪未降方嚴疆事民
力尚艱懼迫常暘敢以預告願施霑渥以軫彫殘區區
此心屢干神聽惟其終惠無替厥功

祈雨諸廟文

某待罪此邦行三年矣無政及民而神每相之雨暘以

時歲常有秋故當艱難之際彫瘵稍蘇公私兼濟者神之賜也今淮甸用師之後上方經理中原調度所須孰非出于民者旬月以來常賜為沴宿麥將刈穀種未播人以旱告是用惕然雖抱病不敢安于室起而有請徧禱山川百靈曰斯民之困久矣天既厭亂剪除妖孽克復王業適在今日然必先得年而後可濟其奔走從事相與祇承帝命豈惟羣有司之職神亦預有責焉尚此朝暮賜之餘澤使無失其西成之望神之為貺蓋有待

于他時者惟無替其常德

祈雨請寶公入城文

亢陽為孽必在春夏之交饑饉所憂常當師旅之後方
淮壩之罷警適雨澤之不時麥苗之須朝夕是懼雖徧
走羣望預竭吁嗟之求非歸依大雄孰協慈悲之應仰
憑覺力洞鑒惻誠憫其卒歲之危惠以崇朝之施少安
彫瘵兼濟公私

謝雨送寶公還山文

時暘之病仰茲大悲膏雨之施遂周浹日耒耜競起溝
壑可逃雖宏濟之心無可言謝而迫窮之請有愧於中
仰止靈山旋歸寶室傾城拜賜莫寫斯民之誠行道載
歡已卜豐年之慶惟其昭事願竭此心

謝雨送洞府龍神文

比之亢陽往干時澤惠然肯臨為我心惻雲車始興百
靈並趨浹日五雨無槁不蘇愧我非德何以拜賜有呼
必聞則惟神志往餞于途旗纛有光我心孔懷曷日而

忘惟天與君靡民不育惟我與神皆民之牧願廣此心
各竭幽明俾歲如茲永慰民生

祈雨寶公塔文

頃迫春耕控祈未幾茲緣民病復敢有言念此疲氓方
安舊業開口待哺惟茲耕耨之勤盡力撫循猶有溝壑
之慮豈容仍歲不獲有秋已愆布種之期重軫曠瘠之
責敢逃屢瀆曲冀垂慈法施無邊固未忘於終惠危誠
易感尚有俟於崇朝

祈雨諸廟文

布種失時民以病告雨暘應節惟神是司敢以吁嗟之
求而冒聰明之鑒誠意既迫在此旦暮之間靈貺俯臨
不難指顧之惠竭誠懇請指日為期

謝雨寶公塔文

民生孔艱自貽災沴法施無盡終荷憫慈今茲踰月之
間屢切無年之懼卒霑大賜頓釋羣情難名廣大之功
惟切皈依之志

謝雨諸廟文

比迫農時亟以旱告亦既踰月將害萊盛卒蒙霽霈之
祥盡消枯槁之患仰非明德孰惻危誠報德之心無物
以稱有年之賜尚鑒不忘繼自斯今益虔祇事庶扶天
造共保遺黎

祭文

徽宗皇帝祭文三首

天步初艱為中原而遠狩帝鄉不反傾率土以纏哀逝

聞靈御之還彌切遺弓之慕威容如在偉烈具存參帝
王步驟之餘皆期力致接天地混茫之化獨以心成俄
興無妄之災莫測蓋高之意雖神遊八極固無爾界之
殊而夢錫九齡終屈羣生之望臣頃持從橐嘗適垂旒
永懷未報之恩攀髯已遠徒抱無窮之戀隕涕何追

留守司

應期撫運悼厯數之有終紹業承休仰威靈之如在神
遊不返仗衛未還爰追在宥之初實際承平之運典章

文物粲方冊以具存東西朔南奠海隅而咸服豈期禍
變橫起遐陬撫恒嶽以北巡既窮朔易越函關而西度
寧間流沙俄成脫屣之遊莫極垂衣之化臣拘縻郡綬
阻造靈輶泣血書辭固難名于大造銘心戴德徒自結
于孤忠

建康府

神凝帝所孰測真游澤在人心難忘孺慕望鑾輿之來
復追玉几之始憑力圖斯民寧憚戎車之駕歸格藝祖

莫聞清蹕之音痛裂五情哀纏九土載念憂勤之蹟尤
高繼述之功周歷更傳方賴延洪之緒堯仁廣被尚懷
過密之思臣拘守封圻阻趨仗衛攬涕蒼梧之野陳迹
空存馳心汾水之陽餘生永已

祭謝侍郎文

仕以學優業以志勤我行四方所居必羣克踐斯言夫
誰易君如耕硯田既菑既芸剪其蒿根待以雨霽及夫
既登靡實不蕢如營大厦樸斲斧斤取材鳩工自楠及

禁逮夫成落丹腹惟文念初相從不寐載欣豈曰邂逅
婚姻之云君亦謂我皁白太分肯獨我知掇彼澗片一
紀于茲世方糾紛顧瞻茫茫邈其無垠孰拯孰援蕩其
稷氛孰闢孰除奮其矛矜中夜起歎卧不及昕謂自折
衝豈惟三軍文武天子允集大勲擢君不次發其清芬
豈弟之政人飽其饋溫厚之誠士沐其醺胡不少留遽
殞江濱奉訃失聲心馬如焚五尺之旌三尺之墳已乎
遂茲往者如雲豈無善類孰為猶薰嗟我老矣童頭駕

筋念昔許我並鄰桑粉今幾何時倏閱朝暉君不可還
徒懷蒿焄古今同然逝波汙汙尚有此辭君乎猶聞

祭韓運使文

忠憲之德博厚溫恭左右仁祖既有顯庸是生康公至
于莊敏宜其孫曾百世不泯侃侃大夫莊敏之孫盛然
慈和克紹其門宣和丁亥從我許下二十二年如閱晝
夜持節西來再見江瀕從遊彫零存者幾人謂當周旋
握手未幾一病莫留遽告不起君晚聞道湛然虛明臨

訣告我曠無遺情夢幻去來君亦何有我獨悲傷哀此
朋舊殮以時服祭以家蔬君像在堂甚瘠而癯味君之
言僅隔晨夕殞涕陳辭尚君來食

祭周大夫文

文安手足同產五人其四先亡非君孰親石林藏山同
一雪濱百里而近實相為鄰我雖老矣來往莫頻話言
相聞意則甚真君晚自言得妙谷神挾不死藥可閱大
椿云何不淑遽蛻羈塵幻化固然孔懷婚姻四十三年

如越暝晨中間憂樂曷可具陳凌雲超然一笑天鈞揆
君之知寧計此身我獨何為淚落霑巾緘辭寓哀百念
酸辛

祭淨山主文

我葬先君于卞之麓遂將終焉因以卜築惟時導師凜
若冰玉惠然我從實慰幽獨兩居既成左松右竹瀉山
水牯各自放牧浩歌相逢不唱無續俯仰三紀倏如轉
轂今者何為棄我不復愧生滅想未免凡俗無縫之塔

照映巖谷是第一祖開山老宿子孫無忘尚見遺躅欲
知其勤視此喬木

顯祖贈太師惠國公樊黃文


某待罪建康之二年上不以為無能過錄其勞進職資
政殿大學士禮得通贈二代是歲大享明堂賜我顯祖
爵而詔之曰爾祖實浮於名莫克究厥蘊惟爾慈孫嘗
登揆路用肇開國于惠以蔭庇于嗣人某隕越感泣懼
無以承天子休德而私竊自幸我顯祖之遺烈餘懿實

獲暴耀九泉屬以再留間寄不獲躬致奠謁夙夕不敢
寧謹遣曾孫男右宣義郎充江南東路安撫制置大使
司書寫機宜文字模奉告歸省虔薦于墓道尚惟明靈
鑒格某不勝悽愴慘噓之至

顯考贈太保焚黃文

某不孝弗獲盡養于我顯考使之耄期百年終身之憂
未嘗一日而忘尚惟天子仁聖時得追賁九泉潛德懿
行猶以表見後世頃初預聞政事驟越常典進位少師

後凡四當大禮有司限止法仍守舊秩去歲秋明堂禮
成以其忝資政殿大學士于是始開公爵有太保之命
幽顯存歿其寵綏之亦已至矣而某終無以奉承先訓
仰圖報塞徒感悼震越不遑寧處復蒙誤恩再守留鑰
不能即歸省謹遣孫男右宣義郎充江南東路安撫制
置大使司書寫機宜文字模躬造墓下明靈不昧尚克
鑒臨某引領東望涕淚淒愴不知所言



建康集卷四